

上虞縣誌（光緒）三



上虞縣志卷十二

列傳

人物

陳于前

徐宏仁

子芳族弟

錫川

顏應元

夏存仁

陸拱辰

張元鑑

趙金簡

經爾顯

陳光林

王致中

子煥徐殿最

萬廷錫

曹式寬

許則男

陳邁黔

趙琴

趙孫英

范曰俊

石文

張鳳翥

族兄弟鳳閣鳳翔孫濤

張文瀾

羅煥

鄭驤路

潘文炳

章軒

范衷

子延懋

朱亦棟

王煦

李鼎

丁志元

許鼎占

謝賜

林江

何如鏡

范繼昌

葉向宸

楊光南

徐迪惠

陳瀛

徐文潮

孫辰榮

錢駭

王望霖

沈奎

謝萊

錢玫

沈清瀾

劉鎮揚

葛鵬飛

許正綬

朱學富

徐長青

錢應昇

趙啟玉

朱旌臣

袁希祖

陳景祺

錢世敘

徐虔復

丁文秀

王燕

石元佑

王殿孝

王淮

國朝二

陳于前字獻若幼聰穎博通六經四子凡漢唐注疏及宋
元明諸儒註說所未及者俱別有心解所著四書講義方
棨如徐廷槐輩稱其精研羣說默契聖賢咸尊信之晚由
歲貢官錢塘訓導教人以主敬窮理爲本土風丕振督學
彭啓豐語其屬曰陳先生深潛純粹發明至理今之陸平
湖也遇事剛果不屈陳學使其凝倨慢虐士按臨時有童
生某覆試後至陳怒欲加以刑于前力爲祈免不解抗聲
曰公提學非提刑也何必爾陳爲懾服年七十六卒於官
于前痛親不逮事歲時輒流涕因自號曰豈莪處事接物

胸中灑落有霽月光風之致講義外又著有豈莪齋文集

子潮字蓼聞

恩貢生博學工詩文

嘉慶志

徐宏仁字聖木生而岐嶷年十二應童子試郡守奇之以
屬教授陸鴻勳十五父歿家貧無以殮書鬻身券質錢陸
公聞之贈貲得殮至是貧甚廢學日糊其餬得數十錢養
母年二十發憤卒業晝則負販市廛夜則篝燈讀書與孟
太史騷有姻婭居相近時往問字學日進遂補博士弟子
食餼於庠以行義爲諸公所推重學使王蘭生欲薦賢良
方正力辭不就已補歲貢生雍正十三年以孝廉方正薦

恩賜六品頂帶宏仁事母孝母病禱於神請減己算以益母壽病遂瘥季弟卒京邸訃至念母老匿不以聞私屬所親將柩歸葬歲時僞寄弟書并銀物終母之世不令知弟之亡也兄歿敬奉寡嫂撫幼孤嫂兄某欲奪其志宏仁力全之學主躬行於義利公私之間辨之尤晰所訂四書訓故乾隆府志作四書講義據家傳及行狀改積二十餘年而成嘗館於鄉火起抱訓故立淺沼中曰保是足矣子芳字名遠乾隆癸酉舉人嗜學工文詞行誼甚古族弟錫川卒於京芳爲經紀其喪治其歸櫬家庭之內事兄如父所著留餘堂稿同年

人物

友湯某爲刻行世錫川博雅能文終日鍵戶抱一編舉乾隆丙子鄉試流寓京師未嘗一過顯者門以攻苦積勞卒人感惜之

據乾隆府志嘉慶志兼家傳行狀纂

顏應元邑之章鎮人鄉有池湖壩圯久屢遭水患捐貲築堤以障之嘗拾遺銀一裹宣言於衆曰此銀約二十兩非積勤苦所致卽貿產以資生者所係匪淺坐待之旁有希倖獲而給之者應元予以碎銀五錢至暮無覓者始歸次日鄰村龔姓倉皇造門請遂益以已財補數還之

沈奎乾補稿

隆時又有夏存仁者一日晨過下壩市拾遺銀二十餘兩

守至午有一人狼狽至問其數適符檢還之其人不謝去
市上人爲代不平存仁不問姓名反婉言解之此二人迨
行誼甚古者

據采訪冊

陸拱辰邑人乾隆三年以州同署獲鹿縣事四月明敏果
斷溫厚和平民悅其來之晚而惜其去之速

獲鹿縣志

張元鑑雍正癸卯舉人知河南虞城縣有惠政民戴之若
父母時巡撫田文鏡嚴甚屬吏憚之鮮當意者獨愛元鑑

長厚乾隆間題祀虞城名宦

嘉慶志

趙金簡字玉書又字石函寄籍嘉善登乾隆己未進士

兩浙

輅軒錄

初爲河南通許知縣民愛戴之三年改杭州府教授

凡十八年乃罷爲文清微醺茂啓迪後進肫然不倦性廉

介不受餽遺年至八十餘家徒壁立處之晏如學者稱赤

繡先生

杭州府志

金簡才弇雅胸襟瀟灑工書兼精賞鑒詩得

宋人逸趣天台齊召南以才子目之及卒錢塘梁同書贈

地葬西湖

兩浙校官詩錄

著有石經古屋詩文稿十六卷行世

輅軒錄

經爾顯字維周雍正元年任四川廣元典史一以廉靜爲

理民愛之稱經老佛廣元有大山曰千佛崖崖下爲李家

灘水中亘立三石舟過稍欹觸石舟立壞會大旱水涸石
根出爾顯募工鑿之不能動乃殺牲爲文禱於神積薪燎
之石驕然離故處過舟自是無患邑有虎白晝噬人至八
十餘爾顯召獵戶射斃四虎患頓除乾隆甲子陞福建赤
巖司巡檢廣元民祖送不忍別至閩兩載歸卒於家年七

十九 據黃嶽
撰傳

陳光林字孝義五齡父天球染癘疾家中落母何氏以子
幼寄夫兄所而已赴會邑作升斗謀去不返音問絕逾年
天球死光林孤苦九歲爲人牧旣冠勤農事佃田償租外

稍得羸餘卽愴然曰母入會邑久矣存耶當迎養亡耶當歸葬若不幸適異姓亦當面母一慟以終恩義遂入會邑徧訪資斧竭哭而返明年又徧訪復不見歸乃哭禱於鳳鳴山神夢神謂之曰念汝孝令汝母子重聚毋過悲三年復入會邑誓必見母累月無蹤跡坐道旁晝夜哭甚哀行路爲之流涕忽一老僧叩其故曰汝不識舅氏豈能獲母耗光林肅然跪請老僧曰汝舅家無定所念汝孝吾挈汝往夜買舟黎明叩門入舅詢之曰此汝甥三年尋母者也舅諦視之驚曰吾負汝吾負汝向者年荒不能容食指汝

母怨我甚說往諸暨傭工今汝去坊都不知存亡未卜若
之何光林悲益甚曰不見母誓不歸遂偕舅氏入諸暨徧
訪遇暨人與舅氏識舅詢之曰汝姊尙不死不數十里抵
某村問刑書某家見汝姊矣卽日踵門謁見母子不相識
舅語之故且喜且悲聞者感歎謂非神明導之來不至此
爭贈贐餞別嘖嘖稱陳孝子云

嘉慶志

王致中字道和乾隆辛未夏大旱歲饑致中傾困倒篋賑
給桑梓者數月乙亥秋潮水淹沒田禾歲又饑致中給錢
米計口分賑每男婦大口米二升青蚨四百小口半之踵

人物

門乞食者爲黍食之人一盂佐以藿鹽自八月至次年四月給濟之無倦容年六十子孫謀稱慶誠弗許曰近村某渡橋梁未成某地塘路未甃可卽以稱慶所需費修葺之肆筵設樂奚爲哉督憲喀以芳型足式旌其廬裔孫煥丙午秋嚴郡溇遂二邑大水死者蔽江下煥募丁壯涉波浪中收遺骸數十具棺槨瘞之邑當乾隆辛未後癸酉乙亥仍歲饑荒民之凍餒者無慮千萬時與致中同振各鄉者捐米千斛則有萬廷鎬施衣給食則有徐殿最殿邦廷鎬喀督以古道克敦表其門殿最兄弟以任卹可風旌皆有

德於鄉邦義聲聞遐邇者殿邦尤以孝友稱父病刲股以療從姪瞽父爲贈金娶婦殿邦承父志養其一家終身嘗由恩貢選授州判以兄殿最卧病遂不赴白首依依如兒時據嘉慶志徐氏家傳重纂○案舊志有萬邦懷傳所載築永濟閘建菴割田事與水利張立行永濟閘記中萬德新事同當卽一人不必再傳惟傳稱邦懷長厚有古風同居七世食指不下數百閘門翕如爲張記所無附志於此

曹式寬字而栗國學生居恆端方好義嘗閱計簿見祖若父名必拱立一日買魚市肆主者以其素不校也多與之携至家知魚多返走六七里還其餘年四十無子其妻龔

爲娶一妾夕入房妾潛然淚下詢之妾已有夫因仇家誣夫爲賊久繫獄故鬻身以贖夫罪式寬卽出房待旦促媒氏送歸不索其價并資助之龔氏遂於是年生子

嘉慶志又

有許則男者字伯麟事母陳以孝聞年老無子將納妾乾隆壬申姚人毛萬榮喪母貧無以葬謀鬻妻則男納焉入門見婦有戚容問其故婦具以實告則男急覓其夫還之萬榮愕甚則男再三慰諭之不索聘金夫婦感謝去越數歲連得二子人皆以爲陰德之報

據采訪冊

陳邁黔字星瑞諸生力學不倦築半塾書屋於西南門外

教授生徒一時從游者皆知名士熟諳鄉先掌故著有以
俟集嘉慶時趙琴著課餘卮言於本邑遺事亦多紀述據嘉
慶志采訪冊

趙孫英字蓋峰登乾隆乙丑進士授刑部主事以讞僞稿
一案賜元寶二錠擢江蘇司員外郎兼理河南貴州兩
司陞郎中大學士傅公恒特奏調吏部文選司郎中視事
三月欺弊無所乘踰年授山西冀寧道伊犁旣平回部入
覲晉當孔道讌勞之節孫英實總其成嘗一夜馳數百里
不言勞辛已駕幸五臺召對稱旨擢直隸按察使

人物